

Usina a calhaus * de Carressa e Cassabè

Ua administracion autista au servici de projèctes d'un aute atge

Contèxte : conferéncia de premsa deu 3 d'abriu a l'iniciativa de APOV, Salmo e Sepanso 64 & 40 au Pont de Goat suu Saleis a Cassabè.

Lo 3 qu'ei l'endoman deu 2 - data limit per la Sepanso qui a sasit lo tribunau administratiu d'un tresau memòri acompanhat d'un quarantenat de pèças mei suu dossièr.

Ua conferéncia d'informacion e d'escambi dab los ribarencs deu Gave d'Auloron, deu Saleis e tanhents de l'entornament : un petit centenat de personas qui's mobilizèn en un temps recòrd. Que s'exprimín Michel Rodes e Georges Cingal per la Sepanso Bearn e Lanas per un expausat factua documentat e argumentat, Antoine Domenech per Salmo qui demanda si non serem pas "ua colonia interiora" ? Philippe Garcia per Défense des Milieux Aquatiques qui denuncia la "COGEPPEAU" petit nom afectuós deu COGEPOMI e André Courrèges per l'AFR (Association Foncière de Remembrement). La gent presenta que son reconeishents per aquestas informacions e lo sentit de quin se passan las causas en las amassadas o los entorns tecnicos e oficiaus.

Despuish 2016 los prefèctes que renóncian, un constat vededer se comentan los organizators, a assegurar la securitat de la plana de Carressa e Cassabè e deu son parçan. Sordeish que s'i hidarèn mei a un estudi privat lo d' "ISL" que non pas aus estudis oficiaus.

Aqueths estudis (quate de l'Estat e deu Departament) que disen lo retortelh/meandre qu'ei a risc permanent d'estar copat en dus a cada aigat. Per la SEPANSO la risca qu'ei mei grèu dab ua gravèra. Lo projècte DANIEL-DPL que s'esteneré sus 19 ectaras e 14 m de pregon en plen miei de tèrras agricòlas perennas de bona qualitat que hèn viver mei d'un quinzenat de personas.

En 1994 (22 de junh) l'àiòla de la DREAL, qui's respèctava enqüèra, qu'escrivè lo grope DANIEL qu'avèva de's "reconvertir" e de deishar l'espleitacion de gravèras hens l'heits màgers deus gaves e de passar a gravèras secas.

En junh de 2016 qu'intervien ua autorizacion prefectorau curiosa (e capberruda) a maugrat :

- l'avís contre deu comissari enquestaire,
- las riscas idraulicas qui son denegadas,
- l'arrestat ministeriau deu 22/9/94 qui defen las espleitacions de gravèras dens l'espaci de mobilitat deus cors d'aiga,
- l'abséncia d'acòrd dab l'Association Foncière de Remembrement, proprietària deus camins,
- l'abséncia de referéncia au SDAGE (esquèma director de l'aiga) aplicader en 2016.

Un navèth arrestat prefectorau qu'intervien lo 26/01/2021 per lo quau DANIEL-DPL obtien tot prumèr lo repòrt de l'audiéncia en tribunau administratiu. Un arrestat qui contraditz lo prumèr arrestat puish a DANIEL-DPL qu'ei dispensat d'abòrd d'aver l'acòrd de l'AFR e qu'obtien apuish lo miei escambiaire a 14 M d'€. DANIEL-DPL que finança lo miei escambiaire a 400 000€ suus 14 Milions. E lo demei de las despensas ? Votz que s'i hèn per breubar lo principi **a moneda privada finançament privat**.

- DANIEL-DPL que's contraditz :

. non lo hèn mei besonh de camins gondronats de 6 m de larg.

. que desbomba qu'avè demandat la destruccion/reconstruccion deu Pont de Goat qui disèva inapte (7 pajas d'arguments), aus camions de 40 Tònas ! Atau aqueth Pont deu Goat que seré valeder per 78 camions per dia !

E tieneran aqueths camins de tèrra dab camions de 40 Tonas ! E qui pagarà lavetz lo Pont de Goat a arrehar (chifrat anteriorament per DANIEL-DPL eth medish a 56 000 €) ?, e l'entertien deus camins, de las rotas, de las digas, de las tèrras emportadas... ?

- L'itinerari navèth :

. duas zònas de crotzament espaçadas de 1500 m, sus camins de mensh de 3 mètres de larg !

Dab viradas a angles drets o sordeish cutorn d'arrepè !

- **Un itinerari dangerós** : chic de crotzada e qui passaré, sus 250 m, a ras d'ua diga estreita qui susploma lo Gave ! E circularén los 40 Tonas a 4 m d'un escarp fragile de tèrras alluviaus arrognhadas peu Gave en aquesta arriba concava. Tot retortelh (méandre) que's desplaça cap a l'avath e cap a l'exterior ! Com ac disen e cartografian eths-medishes DANIEL-DPL e ISL.

- **Qu'ei ocultat lo cambiament climatic** per DANIEL-DPL e lo Prefècte : ISL-DANIEL-DPL qu'escrivi paja 21 (6.2.1.3) que « lo periòde de tornar d'aigats suu retortelh/meandre qu'ei de haut o baish 15 ans ». N'ei pas exacte : se i son estat tres aigats de mei de 1700 m³/s enter 1922 e 1968 que n'i son ueit dens las quaranta darrèras annadas de 1969 tà 2018. Que hè lavetz vint e ueit aigats "vintennaus" en... 40 ans. La frequéncia, la dangerositat que van mei anar mei viste. DANIEL-DPL qu'ei dens lo denegar. Aqueste arreatat prefectorau non vòu pas tiéner compte d'aqueths estudis. N'ei pas reglamentar que la DREAL s'arrefuse a integrar lo cambiament climatic e lo principi de precaucion com leis e reglaments e l'i obligan. N'ei pas enteneder que DREAL e Prefectura e s'estimen mei créder un estudi privat, ISL, pagat peu peticionar DANIEL-DPL meilèu qu'a quate estudis rellevant de la comanda publica.

- **Un itinerari navèth en NATURA-2000 SHENS estudi d'incidéncia** : Error formau qui non passarà en tribunau administratiu que'n son convençut las associacions. Lavetz incuria deu Prefècte e deus servicis ? On ei l'Estat de dret ? Que hè de l'arrespècte de las règlas e de la securitat ? Non sap aqueste Prefècte que lo son davançèr estó condemnat entau cas de Sent Pèr de Lèren - per non respècte de Natura-2000 - au Tribunal Administratiu lo 05 noveme de 2013 ? E l'arreatat de Dauna la Maira de Sòrda, deu 26 de heurèr de 2021, qui defen lo passatge deus camions suu camin inadquat de L'arriberòt, que'n hèn ? **E lo concassader dab los desaguís qui engendra (brut, prova) ? On se trobaré ?**

A Cassabè - (ortografia restituida p. 332 *Dictionnaire toponymique des Communes du Béarn*) - en toponimia literau "devath de la cassora" - lo terrèr que comença on feneishen las *baishas tèrras* inondablas de *Las Barralhas* dinc a *Sus las Honts*. Au mesprètz de las mei elementàrias mesuras de proteccion e d'anticipacion, per rasons d'extraccion de calhaus * tot un equilibri fragile dejà en risca de destruccion totau a cada aigat de mei de 1700 m³/s. Aquestas riscas que son sabudas, comentadas, cartografiadas despuish annadas. Mes a las riscas naturaues que's hornirén las vadudas d'aquesta laca de 19 ectaras. Per las associacions que's hica en illegalitat lo Prefècte. Acceptarà la justícia administrativa torcudas en tau nombre a leis e reglaments ?

Que son determinats los opausants au projècte a anar deféner la tèrra, lor utís de tribalh, dinc a en Aperet e au Conselh d'Estat se per cas e perdèvan a Pau. Que pòt préner 10 ans.

Quan anóncia los tribalhs per l'abòr, lo Sénher Daniel que's vanta.

Lo 3 d'abriu quate associacions qu'an pausat un acte d'informacion ciutadan.

Aquestas associacions qu'an - e sonque - l'energia e las competéncias deus lors membres.

Associà's (20 euros de cotiza annau) que seré ua faïçon d'emparar lo lor tribalh.

SEPANSO PYRENEES-ATLANTIQUES

Maison de la nature et de l'environnement Domaine de Sers 64000 PAU

05 59 84 14 70

contact@sepanso64.org

www.sepanso64.org

* Alternativas a las usinas a calhaus qu'existeishen : l'emplec tornar, conversion de materiaus, granulats reciclats, ... Qu'ei la França hòrt en retard. Quin gausar uei bastir en destrusir mieis naturaues ? Qui non pas causir hialèras de bastir vertuosas ?